

† Dr. med. Stiafen Berther-Lambert



(Corr.) Ils 25 d'ouost 1980 ha in important conduct de bara accompignau las davosas restonzas terrestras dad in bien mieri, exemplaric bab de famiglia e fideivel conburgheis romontsch al davos ruaus el santeri da Grenchen. Gia il num dr. Stiafen Berther di a nus zun bia, ei il defunct il dretg nevs da dr. Stiafen Berther, mieri practicoint duront decennis a Mustér.

Dr. Stiafen Berther ei naschius ils 13 de matg 1912 a Camischolas/Tujetsch sco secund davos da 7 affons. Siu bab Gion Andriu, in pur dalla muntnoga da num e pum, ha saviu cumpignar e perseguitar la via della veta de siu fegl duront biars onns, eis el sez vegnius clamaus al Segner ell'autla vegliadetgna dad 86 onnns. Sia mumma Tresa ha el denton piars gia sco mattatsch en consequenza dad ina disgrazia. Ina greva frida per la famiglia e pil giuvenot che patertgava gia baul ad in studi pli ault. – Suenter las scolas primaras a Sedrun frequenta il defunct dr. Berther ils gimnasis da

Mustér e da Sarnen, nua ch'el finescha il studi gimnasial cun la maturitat federala. Silsuenter studegia el medischina a Friburg, Berlin e Berna. Lu suonda la scolazion fundamentala sco mieri specialist. El studegia els spitals da Soloturn e Berna, per finir quels studis sco mieri-specialist per medischina interna.

Il fevrer 1944 marida il giuven mieri la giuvna Margrith Lambert da Grenchen. Quei ei stau l'entschatta da sia stupenta famiglia: Dus feglis e treis feglis. Ina de quellas feglis ei morta sco affon pign. In de ses feglis ei oz in interpret zun capavel a Genevra, in ei mieri a Berna, la feglia veglia ha maridau il mieri dr. Hürlmann a Hünenberg e la feglia giuvna docescha a Neuschatel, suenter haver absolviu tuts ils studis necessaris. Quella famiglia fuva pilvermo la legria speciella dil car defunct.

All'entschatta ha il defunct dr. Berther practicau ella casa dils geniturs sil Höhenweg a Grenchen. Mo gia 1947 entra el en sia casa nova ella anteriura Wiesenstrasse 57, oz denton Alpenweg 10. Ussa saveva il mieri sededicar cumpleinamein alla lavur della clamada, pertgei da l'autra vart della porta de sia practica menava la dunna la bitgetta. Il defunct ei staus engrazieivels a sia consorta, e quei en buns e grevs dis, pertgei era la casa dil mieri ha sias cruschs. – La midada totala da Stiafen sin Stefan, dagl intschess dell'Alpsu al pei digl Jura ha bein custau al defunct certas difficultads, schegie ch'el gudeva igl agid dalla dunna e dals geniturs da quella. Mo enteifer ils onns ei quei um della muntnoga tonaton vegnius da casa ella planira industriala.

Dr. Berther ei staus mieri cun tgierp ed olma. Denton quei che ses paientz, ses emploiai e ses collegas pre-

ziavan il pli zun vid nies defunct fuva buca sia profunda capientscha medicinala, ch'el approfundava incontin tochen els davos dis da sia veta cun in continuau studi dellas novas retschercas e pusseivladads della medischina. Il far e demanar da dr. Stiafen Berther haveva enzatgei aparti, ruasseivel, mo buca freid, retratg e tuttina zun cordial. Quella sintesa captivava siu contuorn.

Il defunct ha carezau siu lungatg romontsch e mai ni snegau ni tradiu siu origin, era buca amiez dil dialect da Grenchen. Levamein denton plidava il defunct ils lungatgs latins: Franzos haveva el empriu sco commissiunari a Genevra e talian ha el empriu da rudien da ses clients talians, che stimavan e carezavan lur dottore. – Il davos temps s'occupava il defunct cul patratg de remettre sia practica. Quei fuss denton stau pil mieri da tgau entochen pei ina greva hipoteca moralia. El fuva tut leds, sch'el astgava dir ad in paient: Jeu hai gia tractau tiu tat e cuntschau ensem quei che fuva rut. Quei scheva el cun in cert surrir, cun ina satisfacziun da siu operar medicinal.

Politicatein ei dr. Stiafen Berther buca s'engaschaus. El ha era buca acceptau il dretg de burgheis dil marcau da Grenchen, schegie che quella honur ei vegnida offerida ad el differentas gadas. En siu cor eis el restaus in Grischun, in Tujetschin en uorden. Sia clamada lubeva ad el fetg pauc temps liber. 1962 ei siu quinau sedisgraziaus mortalmein, e quei ha sfurzau el da surprender il presidi dell'administraziun della firma Lambert SA. Quella interpresa dad uras, possess artau dals geniturs della consorta, dueva restar possess de famiglia. Mo vesend, ch'ils studis dils affons mavau en autra direcziun, ei la famiglia sedecidida da vender la fatschenta. Il car defunct vuleva buca applicar siu temps liber per liquidaziun da fatschentas, el vuleva viver per e cun sia famiglia. Ses affons e beidis ei stau siu grond plascher tochen alla fin de sia veta. La mort ha raffau navet quei mieri en fuorma rapida. Il mieri enconuscha la mort e sa che la veta ei limitada. Perquei ha Stiafen Berther rendiu sia olma al scaffider el spital da Soloturn cun clar giudezi e beinpreparaus.

Dil defunct dr. Stiafen Berther savess ins raschunar zun bia. El ei denton sez mai staus in grond oratur, el sez ha buca encuretg gronds lauds, e quei ei il motiv che nus finin nossa cuorta dedicaziun a quei carezau defunct. Alla famiglia en malencurada exprimin nus nossa profunda condolient-scha. Il car defunct ruaussi ella pasch dil Segner.